


Pastoor Szpila ta reacciona riba Dr. Rudy Lampe



ORANJESTAD (AAN): Segun Pastoor Szpila, despues cu Dr. Rudy Lampe a entrega keho contra di dje, of miho bibsa contra Iglesia local, representa door di Pastoor Szpila, e ta sinti necesidad di un aclaracion pa mi rumannan den fe.

Na prome luga mester aclara cu palabra "Apostata", kiermeen: "Esun cu a bandona, esun cu a renuncia".

No ta un palabra pues, cu ta ofende, sino ta defini e posicion cu un persona a tuma dilanti di algo, den e caso aki dilanti di sacerdocio (cu Dr. Rudy Lampe a bandona) y dilanti di doctrina di Iglesia (cu el a yama: ridiculo y a propone actitudnan contrario na dje).

Logicamente el a ubica su mes den oposicion na e siñansa di Iglesia. No ta dificil di compronde, cu si bo ta den oposicion, esei ke men cu bo ta renuncia e berdadnan cu Iglesia ta profesa y ta eksigui fieldad na nan. Maske, e exprecion "heretico" lo tabata mas apropiada pa e actitud di Dr. Rudy Lampe, como cu e no a renuncia na e fe cristian, tog ta conosi tambe e uso di palabra "apostata" pa defini abandono di estado religioso (Apostolicae Sedis – Pio IX) of pa remarca e renuncia na e berdadnan di fe, of balornan moral. E palabra aki no ta acusa di ningun echo castigabel pa lei.

Defini so, e ta defini e actitud di un persona den e campo di fe. Cada hende tin libertad pa asepta of renuncia, pa keda fiel of bandona, tanto berdadnan di fe, como balornan moral.

"Heretico ta esun, cu tin

curashi di pensa libremente" – Graham Green a bisa, pero si pa Dr. Rudy Lampe "heretico" y "apostata" no ta algu pa broma, mi ta contento. Esei ke men cu e mes ta reconose su dualu y p'esei su consenshi no ta lag'e drumi trankil. "E miho cusinchi ta un bon consenshi" – sabiduria di pueblo ta bisa. Wel, mescos cu e tin derecho di herida sentimentonan religioso di su propio pueblo, mi ta haya, cu ami tambe (mas tanto ainda den funkshon di Vicario Episcopal) tin derecho pa defini e actitud aki publicamente.

Segun P.Daniel Wieslaw Szpila, e problema ta cu e mesun boca ta pertenese na diferente personalidadnan, entre otro na: Pader Rudy, na Paralamentario Lampe y awor na un vocero di ambientenan liberal. E skisofrenia aki di personalidadnan ta afecta hendenan cu a confia, na e pader, na e parlamentario, na amigo y ta herida nan. Hende tambe tin derecho pa defende nan fe y nan balornan, por lo menos yamando e actitud aki na su number. "Spiritu putri" – ta e decadencia di balornan humano, di un conducta sin moral, sin norma. Un expresion homiletico, cu ta haci uso di imagen di un macutu di frutanan: esnan di Spirito Santo y esnan putri, di carni, mundano. Atrobe, mi no a acusa, sino mi a adverti pueblo cu Dr. Rudy Lampe ta aproba un manera di bida contrari na esun di Spirito Santo, pues un "spiritu putri". Mester paga tino, pasobra, manera dicho ta bisa: "un apel putri ta dañá henter e macuto". Apel putri den e caso aki no ta e persona, sino e acuerdo pa un actitud inmoral. E acuerdo expresa publicamente door di un persona cu ta gosa di estima y apresio. Algu asina si, por dañá e macuto, por dañá tur e esfuerso di mayornan pa lanta nan yunan drechi, por dañá e animo di esnan cu den un lucha nada facil ta mantene nan normanan, por dañá por fin e mensahe di Iglesia, pasobra ya hende no sa mas kende ta esun cu ta opina, si ta Pader Rudy,

of ta Señor Lampe. Sigun Dr. Rudy Lampe e naturalidad di unionnan homoseksual bo por deduci, entre otro, di e mesun actitud aki di pulganan. No ta bunita tog, di haci un homoseksual pareu na un insecto, of ta asina so por defende sierto comportashon? Paga tino, no ta ami a bisa esei. Esei nos a lesa den corant como deklarashon di Dr. Rudy Lampe.

Naturalmente cu mester hendenan cu curashi pa enfrenta loke ta robes den Iglesia. Pero kico Iglesia ta? E ta, manera Dr. Rudy Lampe a bisa: santo y pecador. Aki nos ta di acuerdo! Iglesia ta santo, pasobra su cabes ta Cristo y pecador pasobra ami ta su miembro. Wel, si un miembro ta drecha, henter e culpa ta gosa di "salud". Tal bes esaki ta e miho caminda pa reforma Iglesia, e caminda di Francisco di Asis. Y pa loke ta trata di e bon number, ami ta combensi cu ningun hende por dañá mi number y ningun hende por dañá e number di Dr. Rudy Lampe. Ami so por dañá mi number y ami so por drecha mi number, pasobra mi number ta mi bida. No tin un hues riba mundo cu por hacie pa mi. Pero si esaki por duna gloria y honor na number di Dr. Rudy Lampe, cu gusto lo mi sufri e castigo di mas severo posible.